

## **E CE AVILIMENT?, CHESTE BIADE ITALIE!**

«Cui sarajal mai il pissighet da l'Italie?».

Al è tant che cheste domande mi sbuligne dentrivie. Une Italie che va in slàcare, come che parâtri a ere usade di secui in ca, mi fâs inpression, dûl e disperazion. Il biel al è che si sta copant dibessole, dî par dî e no rivi odore di viodi un parcè in chest sacrifici e nancje no viôt cemût ch'a rivi odore di scjuvâ une fin cussì sclagne. Nond'è resons grandis, ideâi ch'a ti scjaldin cûr e anime; dome cuistions «piçulis» e pedoglôsis: piçulis invidiis, intares di mierde, bramis ch'a son dome bufulis, deliz di bètule, congjuris di breâr, berdeis di seminari, senis di gjostrârs. Cragnis che però e àn la fuarce di sassinâ sitâz e campagne e di gjavâ la sigurece dal vivi e ancje la gole dal vivi. Di gnot, in Italie tocje lâ fûr dome par un sanscugnî e nond'è sigurecis di podê tornâ cjase cu la scusse interie.

De culture bavôse e tabajote dal Sîscent o sin passâz al vuetit conplet di culture dal moment presint. Daspò de tragjcomédie dal fassisin, l'Italie e jè tornade `es sôs tradizions plui gjenuinis: baronade, rivolte, inbroi, secuestri, brigantagjo, robarie, scandul, e fufigne.

Nô talians no sin nè i prins nè i unics a cjatâsi in cheste clime. Però si stin sdongjant ai paîs là che l'inclusion de libertât e à puartât il disordin sicu regule di vite, il delit sicu mieç par rivâ al podê, la confusion sicu clime sociâl plui adate pes grandis «novitâz» (che in altrò e àn biel palesât di no fâ diventâ l'omp plui atîf o mancûl avilît).

Cheste Italie che sta scjadint, mi prodûs un malât sidiât di un disordin di miedis ch'a tirin fûr une medècule daûr cheâtre e magari a proponin di operâ, seti par tristerie croniche seti par ignorance inperdonabil seti par stupiditât `reditarie seti par debolece di crepe e curviel seti par manie di novitât.

Lis regjons talianis plui indaûr o plui distantis dal tulîn dal Stât talian, a golin sinpri plui chês regjons o Stâz subît dilà, ch'a stan cetant miei. No feveli dal Sud Tirol, ch'al vares milante resons par distacâsi da l'Italie ma parfin un sbit di isolute tal Mediterani, cuanche no jè adiriture la Sicilie, che vares dibot pice di butâsi cun Ghedafi...

No soi profete e no sai cui ch'al sarà il pissighet dal Risorgjment talian, però nol pò sei lontan, viodint cemût ch'a bol la cite.

(Liberamenti voltât di un scrit di JOSEF PREZZOLINI) dal «Corriere della Sera».

PS. — J rispuint Ricart Bacchelli, disint che Prezzolini al à la pecje di fâle viodi plui nere di chê che jè. In fonz, l'Italie e jè sinpri stade come ch'a è cumô!

(Patrie dal Friûl – 1947)